

LÄNDLER WORKSHOP    Baby Jail 2012 (Text: Boni Koller)

Chönntscht de ganz Tag nüüt als flueche  
Häsch s'Gfühl dass d'im Chreis ume rännsch  
Da git's nur eis: du muesch versueche  
s'Positive gseh und s'guete im Mänsch  
Jede Gängschter isch es Vorbild, jede Zuehälter en Held  
Jede Dealer isch sympathisch, wämmer en näbet de Toni Brunner  
schtellt

Muesch s'Positive gseh und s'Guete im Mänsch                    Ref  
Eifach s'Positive gseh und s'Guete im Mänsch  
Das isch d'Botschaft wo'd us jedem Hollywoodfilm kännsch  
s'Positive gseh und s'Guete im Mänsch

Jede Kontrolör isch sexy  
jede Zöllner isch en Schatz  
Jede Polizischt will nett sii  
mängisch rettet er e Chatz  
Jede Mänsch hät schöni Siite und verdient au mal es Lob  
Mängisch gseht me's scho vo wiitem, mängisch bruucht's es Mikroskop  
Au im Abfall wachsed Blüemli, s'isch nöd alles numme Schrott  
Näbet eme Zumbalehrer isch jede Greis en junge Gott

Muesch s'Positive gseh und s'guete im Mänsch...                    Ref

Jede Architekt isch Künschtler  
jede Mänsch isch au es Tier  
Mänge Mörder isch Veganer  
oder schpillt sogar Klavier  
Zmitzt i de bruune Güle blüet de Enzian  
Und s'hät Öpfelbaum grad bi de de Autobahn  
Die wachsed sogar im Lärme und im Gschtank  
Und was isch s'schöne am Mike Shiva? Irgendwänn wird er sälber  
chrank

Muesch s'Positive gseh und s'Guete im Mänsch...                    Ref